

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԵՅԹԻ ԵՒ ԵՐԶԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ԵՐԶԱՆ, Թ. Տարի, Թիւ 372, Ուրբաթ, 17 ՓԵՏՐՈՒԱՐ, 2017

ՀԱՄԱՅՆՔԱՅԻՆ

ՄԻՐՈՅ ՕՐՈՒԱՆ ՊԱՐԱՀԱՆԴԷՍ

Հինգշաբթի, 9/2/2017-ի երեկոյեան, Մովսէսիք պանդոկի Նուրա ճաշարահէն ներս տեղի ունեցաւ ՀՕՍ ՔՄՄ-ի սիրոյ օրուան պարահանդէսը:

Ճաշարահի մուտքին, պարահանդէսի ներկայացող բոլոր զոյգերը նկարուեցան այս առիթին համար վարչութեանս պատրաստած յատուկ շրջանակով, եւ այսպիսով անմահացուցին սիրոյ այս իւրայատուկ օրը՝ յիշատակի գեղեցիկ նկարներով:



Օրուան խօսնակ օրդ. Մարիա Քեօշկերեանի բացման խօսքէն ետք վարչութեան խօսքը փոխանցեց ատենապետուհի ընկի. Անժելա Գահուճեանը, որմէ ետք ան հրաւիրեց Թեմիս բարեջան Առաջնորդ Գերպ. Տ. Մասիս Ծ. Վրդ. Զօպույեանը իր սրտին խօսքն ու օրհնութիւնը փոխանցելու ներկաներուն: Առաջնորդ Հայր Սուրբի աղօթքով բաց յայտարարուեցաւ սեղանը:

Ապա ելոյթ ունեցաւ յատուկ այս պարահանդէսին համար Քուէյթ ժամանած սիրուած երգիչ Յովսէփ Գասպարեանը, երգեհոնի ընկերակցութեամբ Մարգիս Մարգիսեանի, որմէ ետք հրաւիրուեցան ներկայ նշանուած զոյգերը՝ սիրոյ օրուան կարկանդակը հաստելու:

Խրախճանքը շարունակուեցաւ ճոխ մթնոլորտի մէջ: Ներկաները բարձր տրամադրութեամբ անգամ մը եւս վայելեցին ՀՕՍ ՔՄՄ-ի կազմակերպած հաճելի եւ անմոռանալի ձեռնարկներէն մէկը:

ՀՕՍ ՔՄՄ-ի Քարոզչական Յանձնախումբ

www.aztarar.com

Նշան Վրդ. Լախոյեան Ներկայացուց «ՀայԵրիտասարդը Եւ Դարուս Մարդկային Ու Ազգային Արժէքային Համակարգը» Նիւթով Դասախօսութիւնը

Հովանաւորութեամբ Քուէյթի թեմի առաջնորդ Մասիս Ծ. վրդ. Զօպույեանի եւ կազմակերպութեամբ ՀՅԴ Քուէյթի Քրիստաւոր երիտասարդական եւ «Հրայր Դժոխք» պատանեկան միութեանց վարիչ կազմին, ուրբաթ, 10 Փետրուար 2017-ի երեկոյեան Սրբոց Վարդանանց եկեղեցւոյ մէջ տեղի ունեցաւ «Լսարան» Թիւ 1, «Հայ երիտասարդը եւ դարուս մարդկային ու ազգային արժէքային համակարգը» նիւթով դասախօսութիւն, զոր ներկայացուց Նշան վրդ. Լախոյեան:



Բացման խօսքով հանդէս եկաւ Սիլվի Տերկիւրմէնճեան, որ իր խօսքին մէջ ըսաւ. «Հայեցի դաստիարակութեան ճշգրիտ ուղին կը տեսնենք, երբ հոգեւորական ու աշխարհիկ ղեկավարները ձեռք ձեռքի կը գործեն յանուն հայ ազգի ծաղկման ու յաւերժութեան»:

Ապա ելոյթ ունեցաւ Յարութ Գայթանճեան եւ ասմունքեց Յովհաննէս Շիրազի «Նոյի ագրաներին» կտորը:

Ներկաները լսելէ ետք դասախօսին կենսագրութիւնը, հետեւեցան դասախօսութեան:

Հայր Նշան շեշտեց, որ պէտք է վերլուծել ազգային ինքնութեան բնոյթը, քննարկել ներկայ իրավիճակը եւ ճշդել ազգին վերապրումին ու Հայաստանի վերականգնման գործընթացին դիմաց ցցուող խոչընդոտները:

Ան անդրադարձաւ նաեւ հաղորդակցութեան եւ տեղեկատուութեան արդի միջոցներուն դերին եւ ազդեցութեան: Ապա ներկայացուց Հայաստանի եւ արտերկրի մէջ այս ուղղութեամբ հայ երիտասարդին դերը՝ նշելով գործադաշտին բնոյթը, գործելաձեւը եւ տրամադրելի մարդուծին ու միջոցներուն արդիւնաւետ օգտագործման կարեւորութիւնը: «Ազգի արժէքին եւ լինելութեան մասին անհատներուն եւ խմբաւորումներուն հաւաքական պատկերացումն է, որ կը հիմնաւորէ ազգին գոյութիւնը եւ կը հունաւորէ անոր վերապրումի պայքարը: Ազգին անդամները իրենք զիրենք կը գոհաբերեն ազգային գործին, երբ կը հաւատան գաղափարին եւ կը վստահին առաջնորդող կազմակերպութեան՝ պետութիւն, բանակ կամ կուսակցութիւն», ըսաւ ան:




Վերջապես Նշան վրդ. Լախոյեան յիշեց, թէ հաղորդակցութեան եւ տեղեկատուութեան արդի միջոցները, համացանցը եւ ընկերային ցանցերը ստեղծած են մարդկային յարաբերութիւնները եւ արժէքները կազմաւորող համաշխարհային բարդ համակարգ մը, որ տեղեկութիւնը, մշակոյթը, տնտեսութիւնը եւ հասարակական կարծիքները կը հունաւորէ՝ ըստ դրամատիքական ընկերութիւններու եւ մեծ պետութիւններու շահերուն եւ անոնց տնտեսական ու քաղաքական ծրագիրներուն:

Խօսքի աւարտին ան շեշտեց, որ հաւաքական ճիգերով կարելի է յաղթահարել ամէն դժուարութիւն, սակայն պէտք է այս ծանր աշխատանքը տանիլ համբերութեամբ:

Ապա առիթ տրուեցաւ լուսաբանական հարցերու:

Աւարտին թեմի առաջնորդ Մասիս Ծ. վրդ. Զօպուեան իր հայրական խօսքը փոխանցեց՝ գնահատելով առաջին հերթին երեկոն կազմակերպող մարմնի աշխատանքը, ապա քուէթահայ երիտասարդութիւնը եւ վերջապէս համայնքին մէջ գտնուող Անթիլիասի միաբաններէն Նշան վարդապետին օգտաշատ դասախօսութիւնը:



ՏԵԱՌՆԸՆԴԱՌԱՋԻ ՆԱԽԱՏՕՆԱԿ ԵՒ ՀՐԱՎԱՌՈՒԹԻՒՆ

Երկուշաբթի, 13 Փետրուարի երեկոյեան ժամը 6:30-ին, Սրբոց Վարդանանց Եկեղեցոյ մէջ տեղի ունեցաւ Տեառնընդառաջի նախատօնակ, որուն ներկայ էր հաւատացեալներու հոծ բազմութիւն մը: Երեկոյեան Ժամերգութեան եւ նախատօնակի արարողութիւններուն նախագահեց Քուէթի եւ Շրջակայից Թեմի Առաջնորդ՝ Գերպ. Տէր Մասիս Ծ. Վրդ. Զօպուեան: Համախմբուած հաւատացեալներուն օրուան խորհուրդը փոխանցեց Հոգ2. Տ. Նշան Վրդ. Լախոյեան, որ անդրադարձաւ ճշմարիտ Լոյսէն՝ Քրիստոսէն բխող աստուածային բարիքներուն ու հաւատքին: Այնուհետեւ, նորապսակ գոյգեր առաջնորդութեամբ գաղութիս հոգեւոր հովիւ՝ Արժ. Տ. Արտակ Քինյ. Քէհեաեանի, դպրաց դասին հետ թափօր կազմած ուղղուեցան Եկեղեցոյ շրջափակ ուր վառեցին տեառնընդառաջի արանդական խարոյկը: Հռավարութենէն ետք տեղի ունեցաւ մանուկներու ընծայում:



ՀԱՅԿԱԿԱՆ

ՀՅԴ-ն Հրապարակեց Իր Ընտրական Ցուցակները

ՀՅԴ «Միմոն Վրացեան» կեդրոնին մէջ Չորեքշաբթի օր ՀՅԴ նախընտրական գրասենեակի պետ, ՀՅԴ Հայաստանի Գերագոյն մարմինի ներկայացուցիչ Աղուան Վարդանեանը հրապարակեց ցուցակի առաջին 30 անունները:

Ցուցակը կը գլխաւորէ ՀՅԴ Բիւրոյի քաղաքական ներկայացուցիչ Արմէն Ռուստամեան: Երկրորդ դիրքին վրայ է Աղուան Վարդանեան, երրորդ դիրքին վրայ՝ Դաւիթ Լոքեան, չորրորդը Արմենուհի Կուրդինեան, հինգերորդը՝ Լեւոն Մկրտչեան, այնուհետեւ յաջորդաբար՝ Արծուիկ Մինասեան, Արմէն Բաբայեան, Ռուզաննա Առաքելեան, Սպարտակ Սէյրանեան, Միքայէլ Մանուկեան:

Վարդանեան նշեց, որ իրենց խմբակին մէջ «ասելի» դէմքեր չկան, ցուցակին մէջ նաեւ 45 անկուսակցական կայ:

Դաշնակցութեան կարգախօսն է. «Նոր սկիզբ, արդար Հայաստան»: ՀՅԴ նախընտրական գրասենեակի պետ Աղուան Վարդանեան նշեց՝ արդար, որովհետեւ իրենց համար արդարութիւնը ամէն ինչի հիմքն է եւ բարձրագոյն արժէք: «Արդար Հայաստանը ազատ Հայաստանն է: Արդար Հայաստանը զարգացող, ուժեղ, ինքնիշխան, բարեկեցիկ, երիտասարդ, իրաւունքի, հոգեւոր մշակոյթի Հայաստանն է», ըսաւ ան:

«ՀՅԴ-ն կ'ակնկալէ մեծ քուէ, լուրջ, ծանրակշիռ ներկայացուածութիւն Ազգային ժողովին մէջ», յայտարարեց ՀՅԴ նախընտրական գրասենեակի պետ Աղուան Վարդանեան:

Ան անդրադարձաւ ընտրութիւններէն ետք համաձայնական կառավարութիւն կազմելու կարելիութեան: Ըստ Վարդանեանի, իրենք երկրին մէջ թշնամի չունին եւ բոլոր քաղաքական ուժերուն հետ ալ բնական յարաբերութիւններու մէջ են: «Բոլորին հետ ալ կը համագործակցինք, բոլորին հետ ալ յարաբերութեան մէջ ենք: Ճիշդ է, երբեմն կը զայրանանք, որ ամբոխավարական յայտարարութիւններ կը կատարեն նախընտրական փուլին, բայց ատիկա բնական է», ըսաւ ան՝ աւելցնելով, որ ընտրութիւններու արդիւնքները ցոյց կու տան ամէն ինչ:

Վարդանեանի համաձայն, ՀՅԴ-ի համագործակցութիւնը Հայաստանի Հանրապետական կուսակցութեան (ՀՀԿ) հետ երկարաժամկետ է, բայց համագործակցութեան շարունակութիւնը թէ՛ ՀՀԿ-ի եւ թէ՛ մնացածին հետ կապուած պիտի ըլլայ ընտրութիւններու արդիւնքներէն: «Շատ քիչ կան ուժեր կամ անհատներ, որոնք կը փորձեն ՀՅԴ-ին հարուածել, որովհետեւ անոնք գիտեն ՀՅԴ կշիռը թէ՛ երկրին մէջ, թէ՛ դուրսը, ուստի մեզի հետ կը փորձեն պահել հաւասարակշռուած յարաբերութիւններ», ըսաւ ան:

Աղուան Վարդանեանը յայտնեց, որ կուսակցութեան տարածքային ցուցակներուն մէջ ընդգրկուած է 150 անձ:

«Որպէսզի ձեր հետագայ աշխատանքը աւելի դիւրին ըլլայ, ես ներկայացնեմ մեր տարածքային ցուցակներէն անուններ՝ ըստ ընտրական տարածքներու», նշեց Վարդանեան՝ ներկայացնելով թեկնածուներուն անունները:

Թիւ 1 ընտրատարածք՝ (Աւան, Նոր Նորք, Քանաքեռ Զէյթուն) Առաքելեան Ռուզաննա, Գեղամեան Վահան, Լոքեան Սերկէյ:

Թիւ 2 ընտրատարածք՝ (Արաբկիր, Աջափնեակ, Դաւիթաշէն) Մանուկեան Սիքայէլ, Վարդանեան Յովհաննէս, Յարութիւնեան Անահիտ:

Թիւ 3 ընտրատարածք՝ (Մալաթիա-Մեքաստիա, Շենգաւիթ) Եղիազարեան Արթուր, Սահակեան Միհեր, Սարգսեան Սամուէլ:

Թիւ 4 ընտրատարածք՝ (Կեդրոն, Էրեբունի Նուբարաշէն) Գրիգորեան Լեւոն, Եսայեան Բագրատ, Յարութիւնեան Անահիտ:

Թիւ 5 ընտրատարածք՝ (Արարատի մարզ) Բաբայեան Հայրապետ, Չոբանեան Արտակ, Վարդանեան Արա:

Թիւ 6 ընտրատարածք՝ (Արմաւիրի մարզ) Մինասեան Արծուիկ, Գաբրիէլեան Գագիկ, Կարապետեան Անդրանիկ, Թամայեան Հասան:

Թիւ 7 ընտրատարածք՝ (Արագածոտնի մարզ) Տօնոյեան Տարօն, Շահինեան Գուրգէն, Շահազիզեան Կարէն:

Թիւ 8 ընտրատարածք՝ (Գեղարքունիքի մարզ) Սաղաթելեան Իշխան, Նիկոյեան Արտաշէս, Բարսեղեան Սարիկ:

Թիւ 8 ընտրատարածք՝ (Լոռիի մարզ) Մարտուն Մաթեոսեան, Ջոհրայ Թորոսեան, Կուրեղեան Արմենուհի:

Թիւ 9 ընտրատարածք՝ (Կոտայքի մարզ) Մանասեան Մուշեղ, Յունանեան Արտաշ, Սարգսեան Հայկ:

Թիւ 10 ընտրատարածք՝ (Շիրակի մարզ) Մանուկեան Ռոմիկ, Կուրդիւնեան Աշոտ, Մաթիլեան Յակոբ:

Թիւ 11 ընտրատարածք՝ (Սիւնիքի եւ Վայոց Ձորի մարզեր) Գէորգեան Գագիկ, Պետրոսեան Նունէ, Սարգսեան Արտակ:

Թիւ 12 ընտրատարածք՝ (Տաւուշի մարզ) Սահակեան Արտաւազդ, Մանուկեան Սուրէն, Ալեքսանեան Վարդան:

ՀՅԴ ներկայացուցիչները ներկայացուցին իրենց համամասնական եւ վարկանշային ցուցակները եւ խօսեցան, թէ ի՛նչ ծրագիրով պիտի մասնակցին խորհրդարանական ընտրութիւններուն:

ՀՅԴ Բիւրոյի քաղաքական ներկայացուցիչ Արմէն Ռուստամեան ներկայացուց, թէ ի՛նչ ըսելիքներով պիտի մասնակցին խորհրդարանական ընտրութիւններուն, ո՛րն է իրենց հիմնական նպատակն ու թիրախը:

Ըստ անոր, իրենք բացառիկ նշանակութիւն կու տան այս ընտրութիւններուն, եւ խորհրդարանական ընտրութիւնները իսկապէս բացառիկ են թէ՛ Հայաստանի, թէ՛ Դաշնակցութեան հետապնդած ծրագիրները իրականացնելու համար: Ռուստամեանի համաձայն, այս ընտրութիւնները ՀՅԴ-ի սկսած հոլովոյթին չափազանց կարեւոր փուլն են:

«Մենք արդէն քանի տարի է՝ երկրին մէջ արմատական փոփոխութիւններ իրականացնելու ամբողջական ծրագիր մը կ'իրականացնենք, ամբողջական հոլովոյթի մը սկիզբը դրած ենք, եւ

ասիկա իր արդիւնքները պէտք է տայ կարելորագոյն այս հանգրուանը յաղթահարելու պայմաններուն մէջ: Ընտրութիւնները պիտի ըլլան այն գլխաւոր խթանը, որ կարենանք մեր սկսածը իր աւարտին հասցնել», ընդգծեց ան:

Ռուստամեան շեշտեց, որ երկրին մէջ կուտակուած դժգոհութիւնը յաւերժ պիտի մնայ, եթէ չվերցուին պատճառները: «Մենք այդ պատճառները վերցնելու ուղղութեամբ է, որ քայլերու նախաձեռնած ենք եւ վստահ եղած ենք, որ անոր հիմքն են համակարգային արատները, որոնք մինչեւ հիմա մեր երկրին մէջ պահպանուած են. անձերը փոխուած են, մարդիկ փոխուած են, իշխանութիւնները փոխուած՝ իրենց անուններով, բայց իշխանութեան որակը չէ փոխուած, եւ մենք, նոր սկիզբ ըսելով, նախ եւ առաջ կը հասկնանք, կ'ակնկալենք, որ ասիկա պէտք է բերէ նոր որակի իշխանութիւն, նոր որակի իշխանութիւնն է, որ կրնայ լուծում տալ այս բոլոր կուտակուած խնդիրներուն», նշեց ան:

Ռուստամեան նշեց, որ Դաշնակցութիւնը հոլովոյթ սկսած է, որ պէտք է աւարտին հասցնել: «Անոր համար մենք պէտք է ունենանք այնպիսի ներկայութիւն Ազգային ժողովին մէջ, որ այս հոլովոյթները ըլլան անխափան եւ նպատակային: Այս է ընդհանուր ծրագիրը, որ Դաշնակցութիւնը պէտք է իրականացնէ, եւ մեր խմբակը, որ ձեւաւորած ենք, պատկառելի խմբակ է: Ամէն մէկուն հետ առանձնաբար այս խնդիրները քննարկած, խօսած ենք: Բոլորը տոգորուած են այս գաղափարներով եւ պէտք է գան մեր երկիրը այս ծրագիրով յառաջ տանելու», եզրափակեց ան:

ՀՅԴ Հայաստանի Գերագոյն մարմինի ներկայացուցիչ Աղուան Վարդանեան նշեց, որ իրենց խմբակը կազմակերպուած, երիտասարդ եւ ներկայանալի է:

«Դաշնակցութեան ցուցակին մէջ չկան մարդիկ, որոնք սեփական փառասիրութեամբ կ'առաջնորդուին, մեր բոլոր թեկնածուներուն միակ նպատակը առաւելագոյնը Դաշնակցութեան համար ձայն ապահովելն է», ընդգծեց ան:

Վարդանեան յայտարարեց, որ ՀՅԴ-ն եղած է ընդդիմութիւն, եղած է իշխանութեան մաս, նորէն եղած է ընդդիմութիւն, բայց ՀՅԴ-ն չէ փոխուած: «Մենք չենք փոխուած, մեր խնդիրները, մեր նպատակները, մեր առաջնահերթութիւնները չեն փոխուած: Չկայ բան մը, որ մենք ըսենք ու յետոյ անկէ հրաժարինք, մեր ըսածներուն մէջ չկայ հռետորական, ձայներ հաւաքելու, փախցնելու համար ըսուած միտք մը, որ իրատեսական չէ», ըսաւ ան:

«Անհեթեթութեան կը հասնինք, նայեցէք 10 տարի առաջ ընդդիմութեան ըսածները իշխանութեան հասցէին, նայեցէք այսօրուան իրենց ընդդիմութիւն հոչակած այդ ժամանակուան իշխանութեան ներկայացուցիչներուն եւ նայեցէք իրենց ըսածները այսօրուան իշխանութեան հասցէին, ոչ մէկ բառի տարբերութիւն կը գտնէք, չէք կրնար մեզ մեղադրել, այս երկրին մէջ նաեւ մեր շնորհիւ համակարգային փոփոխութիւններ եղած են, մեր շնորհիւ նաեւ ընտրական նոր համակարգ ձեւաւորուած է, որ աւելի վստահութիւն կը ներշնչէ, որպէսզի ընդդիմութիւնը աւելի լայն ձեւով մասնակցի: Մենք, իշխանութեան մաս ըլլալով, ամէն ինչ ըրած ենք, որպէսզի ընդդիմութիւնը Ազգային ժողովին մէջ առնուազն 1/3-րդ տեղ ունենայ, որպէսզի կարենայ իր զսպող-վերահսկող լիազօրութիւնները իրականացնել», յայտարարեց Վարդանեան:

Ըստ Վարդանեանի, պիտի ըլլան մարդիկ, որոնք պիտի ըսեն, թէ Դաշնակցութիւնը իշխանութիւն է, բայց պիտի ըլլան նաեւ շատ աւելի գիտակից լայն շրջանակներ, որոնք պիտի տեսնեն Դաշնակցութեան ըրածը:

«Մենք 2007-ին իշխանութեան մաս կը կազմէինք, հաւաքած ենք 180 հազար ձայն՝ ունենալով ընդամենը 6000 դաշնակցական Հայաստանի մէջ, այսօր ալ մենք ունինք 6000-6500 դաշնակցական, 2007 թուականին կային քաղաքական ուժեր, որոնք կ'ըսէին՝ 400 հազար անդամ ունին, հաւաքած էին 200 հազար ձայն, կ'ըսէին՝ 200 հազար անդամ ունին, հաւաքած էին 80 հազար ձայն. այս է Դաշնակցութեան տարբերութիւնը», ըսաւ Վարդանեան, ապա աւելցուց. «Մենք չենք ակնկալեր ընտրակաշառքով քուէարկող, յաւերժական դժգոհողներու ձայները, մենք կ'ակնկալենք մտածող, ընկալող, այս երկրին մէջ ապրելու ցանկութիւն ունեցող, այս երկրին մէջ բան փոխելու ցանկութիւն ունեցող մարդոց ձայները, իսկ այդ մարդիկը շատ շատ են»:

«Նալբանդեան Եւ Մամետեարով Մոսկուայի Մէջ Պիտի Քննարկեն Լեռնային Ղարաբաղի Տագնապի Լուծման Հարցը» Կ'ըսէ Զախարովա



Ռուսիոյ արտաքին գործոց նախարարութեան բանբեր Մարիա Զախարովա Չորեքշաբթի օր մամլոյ ասուլիսի մը ընթացքին յայտարարեց, որ 21-22 Փետրուարին Ռուսիոյ արտաքին գործոց նախարար Մերկելէ Լաւրովի հրաւերով Մոսկուա պիտի այցելէ Հայաստանի արտաքին գործոց նախարար Էդուարդ Նալբանդեան:

Բանակցութիւններու ընթացքին կը նախատեսուի շարք մը արտաքին քաղաքական նիւթերու, ինչպէս նաեւ Լեռնային Ղարաբաղի տագնապի լուծման հարցի քննարկում:

«Այցելութիւնը պիտի դառնայ հայ-ռուսական յագեցած երկխօսութեան շարունակութիւնը՝ ուղղուած քաղաքական, առեւտրատնտեսական եւ մարդասիրական մարզերուն մէջ դաշնակցային համագործակցութեան հետագայ զարգացման: Բանակցութիւններու ընթացքին կը նախատեսուի քննարկել շարք մը արտաքին քաղաքական արդի նիւթեր, ներառեալ Լեռնային Ղարաբաղի տագնապի լուծումը: Յատուկ ուշադրութիւն պիտի յատկացուի ընդհանուր համարկման միութիւններու եւ այլ միջազգային կազմակերպութիւններու ծիրին մէջ փոխադարձ գործակցութեան խնդիրին», յայտարարած է Զախարովա:

Ան նշած է, որ 17-19 Փետրուարին տեղի ունենալիք Միւնիխի անվտանգութեան խորհրդածողովի ծիրին մէջ եւ մօտ օրերս Լեռնային Ղարաբաղի հարցով եռակողմ հանդիպումին մասին տեղեկութեան չի տիրապետեր:

«Տեղեկութիւն այն մասին, որ մօտ օրէն տեղի պիտի ունենայ արտաքին գործոց նախարարներու մակարդակով Ռուսիա-Ազրպէյճան-Հայաստան եռակողմ հանդիպում, ես չունիմ», ըսած է Զախարովա՝ աւելցնելով, որ տեղեկատուութիւն ստանալու պարագային պիտի հաղորդէ զայն:

Ռուսիոյ արտաքին գործոց նախարարութեան պաշտօնական ներկայացուցիչին համաձայն, շուտով տեղի պիտի ունենան նաեւ ազրպէյճանական կողմի հետ հաղորդակցութիւններ՝ համապատասխան մակարդակի վրայ:

«Ինքնանպատակ Դաշինքներ Կազմելու Խնդիր Չունինք, Իսկ Ընտրություններին Ետք ՀՅԴ-ի Հետ Կապուած Որեւէ Անակնկալ Պիտի Չըլլայ» Կ'ըսէ Արմէն Ռուստամեան

«Չեմ կարծեր, թէ ընտրություններին ետք Դաշնակցութեան առնչուած որեւէ անակնկալ փոփոխությունն ըլլայ», «Թերթ»-ին հետ ունեցած զրոյցին ընթացքին յայտնեց ՀՅԴ Բիւրոյի քաղաքական ներկայացուցիչ, Ազգային ժողովի Հայ յեղափոխական դաշնակցութեան խմբակցութեան ղեկավար Արմէն Ռուստամեան՝ պատասխանելով այն հարցումին, թէ կարելի՞ է ընտրական փուլին ետք որոշակի անակնկալ փոփոխություններ ըլլան եւ իշխանափոխութեան պարագային ՀՅԴ-ն ընդդիմութեան միանայ:



«Չեմ կարծեր, թէ ՀՅԴ-ին առնչուող որեւէ անակնկալ ըլլայ, որովհետեւ մենք մեր ծրագիրները ունինք, եւ եթէ որեւէ մէկը առաջարկէ միացեալ աշխատանք տանիլ այդ ծրագիրներուն համապատասխան, մենք անոնց հետ համագործակցութեան պատրաստ ենք: Այլապէս Դաշնակցութիւնը չի միտիր ինքնանպատակ դաշինքներ ու միաւորումներ հաստատելու՝ պարզապէս աթոռներ բազմացնելու եւ փառամոլութեան խնդիրներ լուծելու նպատակով», հաստատեց Ռուստամեան:

Ըստ Ռուստամեանի, ՀՅԴ-ն յաջորդ Ազգային ժողովին մէջ կարելի պիտի ընէ, որպէսզի իր սկսած աշխատանքը աւարտին հասցնէ. «Ասիկա պիտի ընենք, որպէսզի չարտօնենք, որ տարուած աշխատանքը ի գուր ըլլայ: Բնական է, որ մենք պատրաստ ենք համագործակցելու այն բոլոր ուժերուն հետ, որոնք այս մօտեցումը կը կիսեն»:

ՀՅԴ-ի պատգամաւորը չ'ուզեր գուշակություններ կատարել, թէ արդեօք հաւանակա՞ն է երկրորդ փուլ եւս տեղի ունենայ. «Մեր առաջադրանքը այն է, որ ապահովենք այնքան ներկայություն, որ այս բարեփոխումներու հոլովոյթը անշրջանցելի դառնայ, ապա սրբնթաց կերպով արդիւնքներ արձանագրուին, որպէսզի ժողովուրդը անոր պտուղները քաղէ, որովհետեւ մենք համոզուած կատարած ենք այս քայլը, որպէսզի երկրին մէջ տիրող դժգոհութեան պատճառները վերցուին: Ներկայիս այդ պատճառները վերցնելու հիմքերը դրած ենք, կը մնայ, որ մարդիկ անոր դրական արդիւնքները շօշափեն», ըսաւ ան:

Ըստ Ռուստամեանի, եթէ Դաշնակցութեան ներկայացուածությունն չըլլայ, այդ աշխատանքը արագ լուծում չի ստանար. «Իսկ եթէ ՀՅԴ-ն մեծ ներկայություն ունենայ, մեր ժողովուրդը աւելի շուտ պիտի նկատէ, որ այս բոլորը իրապէս ճիշդ էին, եւ բոլորն ալ պիտի օգտուին այս առիթէն: Անկէ ետք, հարց չէ, թող մոռնան, թէ որո՞ւն շնորհիւ էր, որ այսպէս եղաւ, բայց ամէն պարագայի ատիկա մեր խնդիրն է»:

Ռուստամեանի համաձայն, ինքնանպատակ չէ Դաշնակցութեան միտումը՝ Ազգային ժողովին մէջ մեծ թիւով ներկայություն ունենալու. «Այսօր Ազգային ժողովին մէջ ՀՅԴ-ն 5 հոգի է, բայց այնքան աշխատանք տարած է, որ 50 հոգի չէր ընէր: 5 հոգիով սահմանադրութիւն փոխել, ընտրական համակարգ փոխել, այսինքն՝ մէկը պատկերացուցա՞ծ է, թէ ատիկա ինչպէ՞ս կարելի

Էր իրականացնել: Եթե Դաշնակցության նախընտրական ծրագիրը տեսնեք, անոթ առնուազն մեկ գլուխը ժողովրդավարական պետության կայացման կը վերաբերի. անիկա գրեթե ամբողջությամբ իրագործուած է՝ ունենալով 5 պատգամաւոր», ըսաւ ան:

Պատասխանելով այն դիտարկման, թէ որքանո՞վ վստահ են, որ այս ընտրական օրէնսգիրքը ժողովրդավարութիւն պիտի ապահովէ՝ հաշուի առնելով, որ շատ մը քաղաքական գործիչներու եւ որոշ քաղաքացիներու համար վարկանշային ցանկին տրամաբանութիւնը այդքան ալ պարզ չէ, Արմէն Ռուստամեան նշեց, որ «կը կարծեմ, թէ վարկանշային կարգով ընտրութիւնները հետագային պիտի վերանայուին»:

«Այստեղի ինդիքը այն է, որ վարկանշային համակարգը վստահ ընտրութիւններէն ետք վերատեսութեան պիտի ենթարկուի, որովհետեւ այստեղ կան որոշ հարցեր, ուր բացթողումներ կան, եւ հասկնալի է, որ ճիշդ չէ այս ձեւը կիրարկել: Բայց եւ այնպէս ասիկա բոլորին համար նոյն ձեւն է», ըսաւ ան:

Պատասխանելով այն հարցումին, թէ մտավախութիւն չկա՞յ, որ այս հոլովոյթը վերահսկողութենէն դուրս ելլէ, Ռուստամեան ըսաւ. «Չէ, եթէ մեր վերահսկողութենէն դուրս ելլէ, ուրեմն բոլորին վերահսկողութենէն դուրս ելած կ'ըլլայ, հետեւաբար այդ առումով վատ չ'ըլլար, որովհետեւ բոլորին մօտ հաւասար իրավիճակ կը տիրէ:

«Սակայն նախնական մեկնարկային պայմանները բնականաբար նոյնը չեն, որովհետեւ ասկէ առաւելաբար իշխանութիւնը կրնայ օգտուիլ, որովհետեւ անելի շատ վարկանշային կարգով ընտրուած մարդ կրնայ ունենալ: Բայց այլ առումով, եթէ միւսները կարելիութիւն չունին վարկանշային կարգով ընտրուած մարդիկ ունենալու, ասիկա, ըստ էութեան խումբին փոքր ըլլալուն ցուցանիշն է: Այդ առումով, բնականաբար դժուարութիւններ պիտի յառաջանան, որովհետեւ շատ մեծ թիւով եւ տարբեր տարածքներէ թեկնածուներ պիտի մասնակցին», ըսաւ ան:



Ըստ ՆՅԴ պատգամաւորին, գրեթէ ամէն մեկ ձայն հաշուուած պիտի ըլլայ: «Այսինքն՝ անտեր քուէներ պիտի չըլլան, ասիկա որոշ չափով լաւ է, որ ժողովուրդին մէջ առաւել աշխուժութիւն ըլլայ», ըսաւ ան՝ միեւնոյն ժամանակ չբացատրելով, որ խմբակի ներքին աշխատանքներուն մէջ կրնան «անարդար դրսեւորումներ ըլլալ»:

«Վարկանշայիններուն մօտ կրնայ այսպիսի վիճակ մը յառաջանալ, որ մէկը անելի շատ ձայն ստանալով՝ իր իսկ խմբակին մէջ իր աթոռը չստանայ, իսկ միւսը իրմէ քանի մը անգամ պակաս ձայն ունենալով՝ ստանայ: Ասիկա անարդար է, միւս կողմէ կրնան ըսել, որ մեր մէջ եղող աթոռներն են, ի՞նչ կապ ունի միւսներուն հետ, բայց չէ՞ որ մէջի անձը եւս ջանք ու եռանդ դրած է, սակայն չէ անցած, այսինքն՝ ապահոված է խաղի կանոն մը, որմէ կրնայ օգտուիլ այն անձը, որ նուազ ձայներով կրնայ աթոռ ստանալ», ըսաւ ան:

Պատասխանելով վերջին հարցումին, թէ անիկա կրնա՞յ, որոշ ընդդիմադիրներու ձեւակերպումով, «իշխանական բուրգի» փլուզման պատճառ դառնալ, Ռուստամեան եզրափակեց. «Կը կարծեմ, թէ ներքին դժգոհութիւնը կարելիութիւն պիտի տայ, որ այս ընտրակարգը կրկին վերատեսութեան ենթարկենք»:

ՄԻՋԱԶԳԱՅԻՆ

«Ամերիկյան Ռաքքայի Ազատագրումը Սուրիացի Քիւրտերուն Ձեռամբ Ըլլալուն Վրայ Չի Պնդեր» Կ' ըստ Ըշըք

Թուրքիոյ պաշտպանութեան նախարար Ֆիքրի Ըշըք իր ամերիկացի պաշտօնակից Ճէյմս Մաթիսի հետ Պրիւքսէլի մէջ ՕԹԱՆ-ի անդամ երկիրներու պաշտպանութեան նախարարներու ժողովի ծիրին մէջ տեղի ունեցած հա նդիպումէն ետք յայտնեց, որ Միացեալ Նահանգներ Ռաքքայի ազատագրումը սուրիացի քիւրտերուն ձեռամբ ըլլալուն վրայ չի պնդեր՝ նշելով, որ Պապի մէջ գործողութեան աւարտէն ետք ՏԱՀԵՇ-ի դէմ պայքարը պիտի շարունակուի:



«Թուրքիա Ամերիկայի հետ աշխատանք կը տանի մինչեւ Պապի գործողութեան ամբողջացումը Սուրիոյ քրտական ժողովուրդի պաշտպանութեան ջոկատներու Մընպեժէն հեռացման վրայ», ըսաւ ան:

Ըշըք յայտնեց, որ իր երկիրը երբեք պիտի չընդունի հիւսիսային Սուրիոյ մէջ քրտական ժողովուրդի պաշտպանութեան ջոկատներու վերահսկողութեան տակ գտնուող տարածքներուն մէջ ապահով գօտիներու ստեղծումը՝ աւելցնելով, որ ահաբեկչութեան դէմ պայքարի գործողութիւնները այդ ձեւով չեն յաջողիր: «Կարելի չէ ահաբեկչական կազմակերպութիւն մը այլ ահաբեկչական կազմակերպութենէ նախընտրելի նկատել», ըսաւ ան:

Միացեալ Նահանգներու պաշտպանութեան նախարար Ճէյմս Մաթիս իր կարգին շեշտը դրաւ Միացեալ Նահանգներու նախագահ Տանըլտ Թրամփի՝ ՕԹԱՆ-ի մէջ բեռը հաւասար կերպով բաժնեկցելու պահանջին վրայ: Ան նշեց, որ Միացեալ Նահանգներն ու Միջազգային դաշինքը «Եփրատի վահան» գործողութեան մէջ յաւելեալ աջակցութիւն պիտի տրամադրեն թուրքիոյ:

Երկու նախարարները նշեցին, որ ՕԹԱՆ-ի նիստերուն ընթացքին իրենց կեցուածքները իրարու նման եղած են, եւ համաձայնած են հաղորդակցութեանց ու երկխօսութեանց թիր ղ աւելցնելու:

Մինչ այդ, թրքական «Հիրրիյէթ» օրաթերթը հաղորդեց, որ Ըշըք յայտնած է, թէ Միացեալ Նահանգներու պաշտպանութեան նախարարը այսօր պիտի այցելէ Թուրքիա, ուր հանդիպում պիտի ունենայ Թուրքիոյ զինեալ ուժերու սպայակոյտի պետ Հուլուսի Աքարի հետ, Ռաքքայի մէջ ընթացող զինուորական գործողութիւններուն վերաբերեալ քննարկումներ տեղի պիտի ունենան:

Փենթակոննէն աղբիւր մը «Սի.Էն.Էն.»-ին յայտնեց, որ Միացեալ Նահանգներու պաշտպանութեան նախարարութիւնը ՏԱՀԵՇ-ի դէմ պայքարի կշռոյթը արագացնելու համար՝ առաջին անգամ ըլլալով կը սերտէ հիւսիսային Սուրիա ցամաքային ուժեր ուղարկելու կարելիութիւնը՝ աւելցնելով, որ այդ ուժերը «շատ հաւանաբար որոշ ատեն մնան Սուրիոյ հողերուն վրայ»:

«Եթէ Միացեալ Նահանգներու նախագահ Տանըլտ Թրամփ յառաջիկայ շաբաթներուն այդ գաղափարին հաւանութիւն տայ, ապա ատիկա նկատառելի կերպով պիտի փոխէ Սուրիոյ մէջ ամերիկեան զինուորական գործողութիւնը», նշած է աղբիւրը:

Միս կողմէ, «Ազատութիւն» ձայնասփիւռի կայանը կը հաղորդէ, որ Ազրայէճանի նախագահ Իլիամ Ալիեւ Պաքուի մէջ բանակցութիւններ վարած է Միացեալ Նահանգներու զինեալ ուժերու սպայակոյտերու պետերու միացեալ կոմիտէի նախագահ գոր. Ճոզըֆ Տանճըրտի հետ:

Կողմերը քննարկած են երկկողմանի քաղաքական ու տնտեսական համագործակցութեան առնչուող հարցեր:

Թուրքիոյ Արտաքին Գործոց Նախարարութիւնը Վրդոված Է Կիպրոսի Խորհրդարանին Որդեգրած Նոր Որոշումէն

Թուրքիոյ արտաքին գործոց նախարարութիւնը ծանր քննադատութեան ենթարկած է Կիպրոսի խորհրդարանին կողմէ երկրի դպրոցական ծրագիրին մէջ «Էնոզիս»-ի տօնակատարութիւններու ներառման որոշումը:

Նշենք, որ նախապէս Կիպրոսի խորհրդարանը որդեգրած է Կիպրոսի միաւորման մասին 1950-ի հանրաքուէի (պատմութեան մէջ յայտնի իբրեւ Էնոզիսի հանրաքուէ) տարեդարձը տօնելու վերաբերեալ որոշում:

Կիպրոսի նախագահ Նիքոս Անասթասիատիս իր կարգին յայտարարած է, որ այս որոշումը չի կրնար խանգարել կիպրական խնդիրին լուծումը:

Թրքական «Անատոլու» լրատու գործակալութիւնը կը հաղորդէ, որ Թուրքիոյ արտաքին գործոց նախարարութիւնը՝ քննադատելով Կիպրոսի խորհրդարանի որոշումը, նշած է, որ կիպրացի թուրքերու գոյութիւնը հաշուի չառնող այս մօտեցումը կարիքը ունի հիմնովին փոխուելու, հակառակ պարագային կիպրական հիմնախնդիրին լուծումը շատ աւելի պիտի բարդանայ:

Յիշեցնենք, որ յունուարին Ժընեւի մէջ տեղի ունեցած էին Կիպրոսի հիմնախնդիրին շուրջ Կիպրոսի եւ թուրք կիպրացիներու ղեկավարներուն միջեւ բանակցութիւնները: ՄԱԿ-ի նոր ընդհանուր քարտուղար Անթոնիօ Կուիթերես Ժընեւեան բանակցութիւնները նկատած էր յառաջընթացի համար «պատմական կարելիութիւն»: Կիպրոսի կղզին վերամիաւորելու նախապէս կատարուած փորձերը տապալած են:

Բանակցութիւններու երկրորդ փուլին հոլովոյթին միացած էին Կիպրոսի անվտանգութեան երաշխաւոր երկիրներու՝ Բրիտանիոյ, Յունաստանի եւ Թուրքիոյ ղեկավարները: Կղզին 1974-ին թրքական բանակի Կիպրոսի ներխուժումէն ի վեր կը մնայ մասնատուած:

Փաքիստանի Մէջ Անձնասպանական Գործողութիւն Մը 72 Զոհ Պատճառեց

Փաքիստանեան ոստիկանութիւնը հաղորդեց, որ հարաւային Փաքիստանի մէջ մեծ ժողովրդականութիւն վայելող սրբավայրի մը դէմ անձնասպանական գործողութիւն մը առնուազն 72 զոհ պատճառած է: Յարձակումի թիրախն էր Սիտի նահանգի Սեհուան քաղաքին մէջ սուֆի սուրբ Լալ Շահպազ Քանատարի սրբավայրը:

Փաքիստանի վարչապետ Նաուազ Շարիֆ դատապարտեց յարձակումը, որուն պատասխանատուութիւնը ստանձնեց ՏԱՀԵՇ:

ԱՆԴՐԱԴԱՐՁ

Ինչո՞ւ Պէտք է Քուէարկել Հ.Յ.Դաշնակցութեան...

...Որովհետեւ Դաշնակցութիւնը հետեւողական է իր կեցուածքներուն մէջ եւ իր խօսքին տէրն է:

Հայաստանի խորհրդարանական ընտրութիւններու նախապատրաստական փուլի օրերն են: Կուսակցութիւններ, քաղաքական հոսանքներ կամ դէմքեր հեւքոտ աշխատանքի մէջ են դաշինքներ, ցանկեր կազմելու նպատակով:

Անցնող օրերուն ականատես դարձանք այս կամ այն դաշինքի կազմութեան, այս կամ այն քաղաքական հոսանքի կամ դէմքի՝ տուեալ դաշինքի միանալու փափաքի մերժումին, բանակցութիւններու (կամ սակարկութիւններու) ձախողութեան, կամ համաձայնութիւններու յանգումին:

Իսկ Չորեքշաբթի, 15 Փետրուարին, Դաշնակցութիւնը ըրաւ այն, ինչ որ յայտարարած էր ամիսներէ ի վեր, որ ընտրութիւններուն պիտի մասնակցի ինքնուրոյն, առանց այլ քաղաքական ուժի մը հետ դաշինքի: Այդ օր կայացած մամլոյ ասուլիսին, Հ.Յ.Դ. Բիւրոյի քաղաքական ներկայացուցիչ Արմէն Ռուստամեան եւ Հայաստանի Գերագոյն մարմինի ներկայացուցիչ Աղուան Վարդանեան յայտարարեցին կուսակցութեան թեկնածուներուն ցանկը եւ այս ձեւով ալ յստակացաւ ընտրութիւններուն՝ Դաշնակցութեան ինքնուրոյն, առանձին մասնակցելու հարցը:

Յայտարարուեցաւ նաեւ Հ.Յ.Դ.ի ընտրական կարգախօսը՝ «Նոր սկիզբ, արդար Հայաստան»:

Ի՞նչ բանի կ'ակնարկէ «Նոր սկիզբ»ը: Իր անկախութենէն ի վեր առաջին անգամը ըլլալով, Հայաստանի մէջ կառավարման նախագահական համակարգը կը փոխարինուի խորհրդարանականով եւ սա կարեւոր ու միաժամանակ նոր սկիզբ մըն է, որովհետեւ միաժամանակ՝ երկրի քաղաքական համակարգն է, որ կը փոխուի:

Սկիզբէն էր Բանը...

1918ին, Հայաստանի հանրապետութեան հիմնադրութեան ու ղեկավարման մէջ, մեծ էր դերը Հ.Յ.Դաշնակցութեան: Այդ հանրապետութեան կառավարման համակարգը եւս խորհրդարանական էր եւ ոչ թէ նախագահական: Սա կը նշանակէ, որ Հ.Յ.Դ.ի համար անփոփոխ սկզբունք է խորհրդարանական վարչաձեւը: Այդպէս էր 1918ին, այդպէս էր 1991ին, երբ վերանկախացաւ Հայաստանը ու այդպէս է նաեւ հիմա: 1995ին, երբ Հայաստանի քաղաքական օրակարգին վրայ դրուեցաւ սահմանադրութեան հարցը, Հ.Յ.Դ.ն պնդեց խորհրդարանական համակարգին վրայ, ընդձեռն անոր առաւելութիւնները: Օրին, այս տեսակէտը ընդառաջում չգտաւ եւ այդ օրէն ասդին, Հայաստան կառավարուեցաւ անհատի մը՝ այս պարագային, նախագահի մը կողմէ:

Սակայն Հ.Յ.Դ.ն շարունակեց պնդել, որ անհրաժեշտ է որդեգրել խորհրդարանական վարչաձեւը: Պնդեց ու պայքարեցաւ այդ ուղղութեամբ, միաժամանակ ցոյց տալով, որ ցարդ գոյութիւն ունեցող նախագահական համակարգը արատաւոր է ու ինքզինք սպառելու վրայ է:

Օրերը ցոյց տուին Հ.Յ.Դ.ի իրաւացիութիւնը: Արտաքին ճակատի վրայ Հայաստանի խոցելիութիւնը, միաժամանակ ներքին ընկերային տնտեսական կեանքի վատթարացումը փաստեցին Հ.Յ.Դ.ի թեզերուն արդարացիութիւնը:

Համակարգային փոփոխութեան հասնելու նպատակով Հ.Յ.Դաշնակցութեան մղած յամառ պայքարը արդիւնաւորուեցաւ սահմանադրական բարեփոխումներով: Այս ընտրութիւնները հիմքը պիտի հանդիսանան Հայաստանի կառավարման նոր համակարգին:

Վերոնշեալ մամլոյ ասուլիսի ընթացքին, Արմէն Ռուստամեան, ակնարկելով յառաջիկայ ընտրութիւններու կը յայտարարէր, որ «Մենք արդէն քանի տարի է՝ երկրում արմատական փոփոխութիւններ

իրականացնելու մի ամբողջական ծրագիր ենք իրականացնում... Եւ սա իր արդիւնքները պէտք է տայ կարելորագոյն այս հանգրուանը յաղթահարելու պայմաններում: Ընտրութիւնները լինելու են այն գլխաւոր խթանը, որ կարողանանք մեր սկսածն իր աւարտին հասցնել»:

Յառաջիկայ տարի, 2018ին, երբ աւարտի նախագահ Սերժ Սարգսեանի պաշտօնավարումը, այս խորհրդարանէն բխած կառավարութիւնը, գործադիր իշխանութիւնն է, որ իր ձեռքը պիտի առնէ երկրին դէկը ամբողջութեամբ: Ու այս բոլորը, շնորհիւ մեծ մասամբ Հ.Յ.Դ.ի ճիգերուն: Այն Հ.Յ.Դ.ին, որ ներկայ խորհրդարանին մէջ ունի միայն... 5 պատգամաւորներ:

Ռուստամեան, ընդգծելով այս մասնայատուկ կէտը, կ'ըսէր, թէ ցարդ գործող համակարգէն ներս մարդիկ փոխուած են, իշխանութիւններ փոխուած են, սակայն «իշխանութեան որակ չի փոխուել եւ մենք, նոր սկիզբ ասելով, առաջին հերթին հասկանում ենք, ակնկալում ենք, որ դա պէտք է բերի նոր որակի իշխանութիւն, որ կարող է լուծում տալ այս բոլոր կուտակուած խնդիրներին... Դրա համար մենք պէտք է ունենանք այնպիսի ներկայութիւն Ազգային Ժողովում, որ այս գործընթացները լինեն անխափան եւ նպատակային: Սա է ընդհանուր ծրագիրը, որը Դաշնակցութիւնը պէտք է իրականացնի»:

Ու այս բոլորը շնորհիւ այն հանգամանքին, որ Հ.Յ.Դ.ն համոզումով ու վճռականութեամբ կառչած է իր փայփայած սկզբունքներուն եւ յամառօրէն կը հետապնդէ զանոնք: Այսինքն, «նոր սկիզբ»ի ազդանշանն է, որ կը տրուի Հ.Յ.Դ.ին կողմէ: «Նոր սկիզբ» մը, որուն նկատմամբ յանձնառու է Հ.Յ.Դաշնակցութիւնը:

«Արդար Հայաստան»

Կառավարման արատաւոր համակարգը կը ծնի անարդարութիւն, իսկ անարդարութիւնը մայրն է ամենայն չարեաց:

Հարկ կ'այ յիշեցնելու, թէ Հայաստանի ներքին ընկերային տնտեսական կեանքէն ներս ժողովրդային ինչքան դժգոհութիւն կ'այ: Այս դժգոհութիւնը արդիւնք է անարդարութեան: Անարդարութիւն՝ տնտեսական կեանքէն ներս, ուր մենաշնորհները ոչ մէկ զարգացում թոյլ կու տան ու կը խափանեն չքաւորութեան նուազեցումը, երկրի եկամուտներու արդար բաշխումը, ուժեղ միջին խաւի մը կազմութիւնը:

Երկրին մէջ տիրող անարդար մթնոլորտն է, որ կը նուազեցնէ ապագայի հեռանկարները նոր սերունդին համար: Գումարենք այս բոլորը իրարու վրայ եւ հետեւանքը կ'ըլլայ արտագաղթը, որուն վնասներուն մասին աւելորդ է որեւէ քննարկում:

Շուտով պիտի հրապարակուի Հ.Յ.Դ.ի ընտրական ծրագիրը (փլաթֆորմ) ու հոն պիտի տեսնենք մեր ընկերվարական մօտեցումները եւ այդ նոյն մօտեցումներէն բխած լուծումները երկրի ընկերային տնտեսական խնդիրներուն: Նախորդ ընտրութիւններուն եւս, Հ.Յ.Դ.ի հրապարակած բոլոր ընտրական ծրագիրները հիմնուած էին իր դաւանած ընկերվարական սկզբունքներուն վրայ: Մենք կառչած ենք այս սկզբունքներուն՝ հետեւողական կերպով: Հ.Յ.Դ.ն հաւատացած է, որ միայն ընկերվարութիւնն է, որ կրնայ արդար հասարակարգ ստեղծել, վերջ տալ ամէն տեսակի չարաշահութիւններուն ու շահագործումներուն. ախտեր, որոնք ներկայիս մեր երկիրը ներքուստ կը կրծեն:

Ու ինչքան արդար ըլլայ հասարակարգը, այնքան ազատ կ'ըլլայ նաեւ քաղաքացին. միայն ազա՛տ քաղաքացին է, որ ի վիճակի է իր հայրենիքին նկատմամբ ամբողջական յանձնառութեան: Կասկած չկայ, որ հայրենաբնակ մեր ժողովուրդը կը ձգտի հիմնական բարեփոխումներու: Հ.Յ.Դ.ն փաստած է, որ ինք յանձնառու է այս հիմնական փոփոխութիւններուն: Այս հիմնական պատճառով պէտք է քուէարկել Հ.Յ.Դաշնակցութեան:

ՎԱՉԷ ԲՐՈՒՏԵԱՆ

ԱԻԱՆԴԱԿԱՆ ԲԵՐՄԷՍ

2017

ՍԻՐԵԼԻ ԸՈՒԷՅԹԱԳԱՅԵՐ,

ԲՈԼՈՐԴ ՀՐԱԻՐՈՒԿԸ ԷՔ ՄԻԱՍՆԱՔԱՐ ՎԱՅԵԼԵԼՈՒ ԵՐԵՔ ՕՐԵՐՈՒ
ԸՆԹԱՑԶԻՆ

23-24-25 ՓԵՏՐՈՒԱՐ 2017

ԱՆԱԿԸՆԿԱԼՆԵՐ

ՀԱՄԱԴԱՄ ՃԱՇԵՐ ՈՒ ԱՆՈՒՇԵՂԷՆՆԵՐ

ՉՈՒԱՐՃԱԼԻ ԽԱՂԵՐ

ՀԱՅԱԲՈՅՐ ՄԹՆՈԼՈՐՏ

ՆԱԵՒ ԴԻՏԻ ՎԱՅԵԼԵՆԸ

23 ԵՒ 24 ՓԵՏՐՈՒԱՐԻՆ

ԼԻԲԱՆԱՆԵՆ ՅԱՏՈՒԿ ԺԱՄԱՆԱԾ

ՍԻՐՈՒԿԸ ԵՐԳԻՉ՝

ՅԱԿՈՒԲ ՄԿՐՏԻՉԵԱՆ

մանրամասնությունները յառաջիկային



ԱԿՆԱԼԿ

Աւանդական Ընտրութեան Եւ Նորացուած Քուէարկութեան Արանքին

Համապետական հերթական ընտրութիւններու սեմին է Հայաստանի Հանրապետութիւնը: Հերթականը այս պարագային, պարզապէս խորհրդարանի ժամկետի աւարտին, իր աստենին ընտրութիւններ կազմակերպելու բնութագիր է, ըստ կարգի եւ ըստ ձեւի, քան ըստ էութեան:



Խորքին մէջ նոր համակարգի՝ խորհրդարանական համակարգի առաջին ընտրութիւններն են, որոնք կը կազմակերպուին: Այս խորհրդարանը հետզհետէ կը ստանձնէ նորացուած սահմանադրութեամբ իրեն վերապահուած

լիազօրութիւնները: Այլ խօսքով, ընտրելի Ազգային ժողովը մինչեւ 2018 կ'իրականացնէ այն բոլոր գործառնայթերը, որոնք հետզհետէ գործող Սահմանադրութիւն վերածուող գերագոյն իրաւաթուղթով վերապահուած են իրեն. այն բոլորը, որոնք չեն հակասեր գործող նախագահին լիազօրութիւններուն:

Խորհրդարանական համակարգին անցում կատարած մեր երկրին առաջին խորհրդարանն է, որ կ'ընտրուի այս ձեւով, հետեւաբար քաղաքական գիտակցութիւնը գերակայ պիտի ըլլայ այս առումով:

Այն բոլոր ուժերը, որոնք կտրուկ դէմ էին կառավարման համակարգի փոփոխութեան, որոնք գործող իշխանութիւններու վերարտադրութեան միակ շարժառիթը կը տեսնէին այս բոլորին մէջ, այսօր արդէն շատ աշխուժ մասնակից են ընտրութիւններուն:

Եթէ մէկ կողմէ կայ այն տեսակէտը, որ համակարգի փոփոխութեան դէմ եղող ուժը չի կրնար կրաւորական դիտել ընտրական գործընթացները, եթէ կ'ուզէ ազդեցիկ դառնալ քաղաքականութեան վրայ, միւս կողմէ կայ նաեւ գիտակցական մօտեցում, որ նոր սահմանադրութեամբ ճշդուած ընդդիմութեան տրուող դերով, կայ հնարաւորութիւն ազդելու երկրի թէ՛ ներքին եւ թէ՛ արտաքին քաղաքականութիւններուն վրայ: Ներկայ պայմաններուն մէջ բացառուած է այլեւս միակուսակցական կամ միանձնեայ դեկավարումը: Համախոհական կառավարութեան կազմութիւնը գրեթէ անխուսափելի է եւ քաղաքագիտական ընկալումով պարտադիր-օրինաչափ:

Անկախ այն իրողութենէն, որ կազմուող-քանդուող դաշինքներուն մէջ երբեմն կը բացակայի սկզբունքայնութիւնը եւ յաճախ կ'ընդգծուի քաղաքական ծրագրի

բացակայությունը եւ անկախ անկէ մանաւանդ, որ ռէյթինկային բաժնին ներառումը ընտրակարգին մէջ, ըստ էութեան կը խախտէ հարիւր առ հարիւր համամասնական դրութիւնը, այսուհանդերձ պէտք է կեդրոնանալ ստեղծուած եռուզեռին վրայ:

Բանակցութիւններ, համաձայնութիւններ, բանավեճեր եւ ընտրական պայմանաւորուածութիւններ՝ կ'ընդգծեն նորացուած սահմանադրութեան բերած նորարարութիւնը, ընտրական նոր մշակոյթը, ինչ որ նաեւ առաջադրանք էր կառավարման համակարգի փոփոխութիւնը առաջադրող ուժերուն համար:

Համամասնական ընտրացանկերու հետզհետէ հրապարակումը այն տպաւորութիւնը կը ձգէ, որ կուսակցական, եւ առ այդ՝ այս պարագային խորհրդարանական դաշտի գրագիտացման գործընթացը իրագործելի առաջադրանք է յատկապէս իշխող կուսակցութեան եւ ընդհանրապէս ընտրութիւններուն մասնակցող ուժերուն համար: Ռէյտինկային ընտրակարգը կը ստուերէ այդ միտումը՝ տրուած ըլլալով, որ այդ ընտրակարգով առաջադրուողներուն քուէահաւաքի դերը չի կրնար իրականանալ զուտ գաղափարական-քաղաքական աշխատանքներով, բնականաբար տեղի տալով լծակային գործօնի գերակայութեան:

Մակայն այս բոլորով հանդերձ, անպայման պէտք է տեսնել բաժակին կիսալեցուն բաժինը եւ հաստատել, որ մենք՝ իբրեւ հանրապետութիւն, քայլ մը առաջ ենք դէպի ժողովրդավարական ընտրութիւններ կայացնելու ուղիին վրայ: Անշուշտ գործընթացը ունի քաղաքական հնչեղութիւն եւ պատահական չէ, որ Եւրոպական միութեան կառոյցները դրական գնահատականներ տալով փուլ առ փուլ զուգահեռ շարժումի մէջ կը տեղադրեն Եւրոպական Միութեան հետ նոր փաստաթուղթի ստորագրման գործընթացը՝ ընտրական իւրաքանչիւր նորարար միջոցի որդեգրման հետեւելով եւ համապատասխան արձագանգ ունենալով պաշտօնապէս:

Պետութեան ճիգը ակներեւ է ընտրութեան օրը աշխարհին ներկայանալու ժամանակակից, թափանցիկ եւ առաւելագոյն չափով անառարկելի: Մակայն մինչեւ քուէատուփ հասնիլը ստուերը գործելու, զանգուածային քուէն ուղղորդելու աւանդական միջոցները բանեցնելու նախադրեալները կը համոզեն, որ բուն ընտրութիւնը այս պայմաններուն մէջ կրնայ կայանալ նախքան քուէարկութիւնը:

Սահմանադրութեան փոփոխութիւնը, նորացուած ընտրակարգը հիմնականին մէջ կը հետապնդեն համակարգային փոփոխութիւն, իսկ համակարգային փոփոխութեան կայացման համար անհրաժեշտ է նաեւ արմատական փոփոխութիւն ըստ էութեան ընտրական մշակոյթի եւ ոչ թէ սոսկ քուէարկութեան միջոցառումի:

«Ա.»

WWW.AZTAGDAILY.COM

ԼՈՒՐԵՐ ԳԱՂՈՒԹՆԵՐԷՆ

ՀՕՍ-ի Կալա-2017-ի Ձեռնարկը

3 Փետրուարին «Տաղէան» մշակութային համալիրին մէջ տեղի ունեցաւ ՀՕՍ-ի Շրջանային վարչութեան տարեկան կալան:

Ձեռնարկի կազմակերպիչ յանձնախումբին անունով Քրիսթին Յովնանեան՝ յիշեցնելով Մեծի



Տանն Կիլիկիոյ կաթողիկոս Արամ Ա. վեհափառ հայրապետին կողմէ 2017 տարին «Վերանորոգման տարի» հռչակումը, վստահեցուց, որ ՀՕՍ-ը վերանորոգուած ոգիով եւ հասարակաց նպատակով յառաջ պիտի մղէ իր մարդասիրական լայնածաւալ ծրագիրները:

Օրուան հանդիսավար Ալիս Պետրոսեան հպարտութեամբ յայտարարեց, թէ ինք մեծ հաւատք ունի ՀՕՍ-ի հանդէպ:

Արեւմտեան թեմի առաջնորդ Մուշեղ արք.

Մարտիրոսեան բարձր գնահատեց ՀՕՍ-ի մեծ ընտանիքի անդամները, որոնք լաւապէս կը կատարեն իրենց վստահուած մարդասիրական պարտականութիւնները՝ հաւատարիմ մնալով ՀՕՍ-ի առաքելութեան:

ՀՕՍ-ի մօտիկ բարեկամ՝ Քալիֆօրնիոյ Նահանգային խորհրդարանի անդամ Էնթընի Փորթանթինօ իր կարգին բարձր գնահատեց գաղութին մատուցուած ՀՕՍ-ի մարդասիրական ծառայութիւնները եւ յատուկ գնահատագիր մը յանձնեց Շրջանային վարչութեան ատենապետ Ռեպերա Պերպերեանի:

Ապա Ռ. Պերպերեան փոխանցեց Շրջանային վարչութեան պատգամը: Ան ակնարկ մը նետեց ՀՕՍ-ի առաքելութեան եւ հետապնդած նպատակներուն՝ շեշտելով, որ այն իրականութիւնները, զորս կը դիմագրաւեն ներկայիս՝ կը վերահաստատեն կազմակերպութեան իմաստն ու կշիռը, որոնց վրայ հիմնուած է ՀՕՍ-ը աւելի քան մէկ դար առաջ: Պերպերեան վստահեցուց, որ ՀՕՍ-ը պիտի շարունակէ իր օգնութիւնը Հայաստանին, Արցախին եւ Ջաւախքին, ինչպէս նաեւ տեղական համայնքներուն մէջ իր պայքարը պիտի շարունակէ՝ տնագրկութեան, աղքատութեան եւ ընտանեկան բռնութեանց դէմ:

Ապա ան անդրադարձաւ ՀՕՍ-ի Ընկերային ծառայութեան գրասենեակներու եւ Հոգեբանական կեդրոնի լայնածաւալ ծառայութիւններուն, ՀՕՍ-ի 16 վարժարաններուն մէջ շուրջ 750 մանուկներու հայոց լեզուի ու մշակոյթի ուսուցման, ՀՕՍ-ի զանազան ծառայութիւններուն՝ Հայաստանի ու Արցախի մէջ, կեդրոնանալով նորագոյնին՝ Ստեփանակերտի «Սօսէ» մանկապարտէզի վերաշինութեան ծրագիրին վրայ, որուն բացումը պիտի կատարուի սեպտեմբեր 2017-ին: Պերպերեան յայտնեց, թէ ՀՕՍ-ը ունի բազմաթիւ նպատակայարմար ծրագիրներ, որոնք կ'առնչուին անդամարշաւի, աշխատանքի հորիզոններու ընդարձակման, ծրագիրներու ընդլայնման եւ նոր աղբիւրներու նուաճման: Ան խոստացաւ վերանորոգուած ուխտով շարունակել ՀՕՍ-ի աշխատանքները՝ միշտ վստահելով համայնքի զօրակցութեան:

Այնուհետեւ ցուցադրուեցաւ շրջանին մէջ ՀՕՍ-ին մատուցած լայնածաւալ ծառայութիւնները ներկայացնող տեսերիկ մը:

Հոլանտահայ Կազմակերպություններու Եւ Կառոյցներու Ներկայացուցիչներուն Հանդիպումը Հայաստանի Դեսպանին Հետ

Հոլանտայի եւ Հայաստանի դիւանագիտական յարաբերութիւններու հաստատման 25-ամեակին առիթով, հոլանտահայ կազմակերպութիւններու եւ կառոյցներու ներկայացուցիչներ հանդիպում ունեցան Հոլանտայի մէջ Հայաստանի դեսպան Ջիւնիկ Աղաճանեանին հետ:

Դեսպան Ջիւնիկ Աղաճանեան մանրամասնօրէն ներկայացուց 2016 թուականի Հայաստանի անկախութեան եւ հայկական բանակի կազմաւորման 25-ամեակի յոբելինական տարուան աշխատանքներուն արդիւնքները, սփիւռքի նախարարութեան կողմէ 2017 թուականին Հայաստանի մէջ կազմակերպուող ձեռնարկներու բնաբանը, Հայաստան-սփիւռք կապը նոր հիմքերու վրայ դնելու խնդիրները եւ կրթական ծրագիրներուն առնչուող հարցեր:



Այս ծիրին մէջ լուսարձակի տակ առնուեցաւ Հոլանտայի եւ Հայաստանի դիւանագիտական յարաբերութիւններու հաստատման 25-ամեակը, որ այս տարի պիտի նշուի: Հարուստ մշակութային ժառանգութիւն ունեցող երկու երկիրներուն միջեւ հոգեւոր եւ մշակութային կապերն ու յարաբերութիւնները յաջողութեամբ կը զարգանան: Լաւ նախադրեալներ ստեղծուած են քաղաքական եւ գործարար փոխադարձ համաձայնութեան վրայ հիմնուած գործունէութեան համար:

Հոլանտահայ կազմակերպութիւններու եւ կառոյցներու ներկայացուցիչները անդրադարձան նաեւ գաղութներուն մէջ կազմակերպուող ձեռնարկներուն:

Հայկական գաղութները այս տարի եւս հետամուտ պիտի ըլլան Հայոց ցեղասպանութեան տարելիցին պատշաճ նշման եւ ցեղասպանութեան ժխտման կանխարգելման նախաձեռնութիւններուն:

Հանդիպման մասնակցողները նաեւ ներկայ գտնուեցան այս թեմայով դեսպանատան մէջ կայացած հայկական կիրակնօրեայ դպրոցի սաներուն աշխատանքներու ցուցահանդէսին, որուն աւարտին լուսագոյն աշխատանքները գնահատեցին:

Երկուստեք հետաքրքրութիւն ներկայացնող այս օգտակար հանդիպման ընթացքին ուղղուեցան բազմաթիւ հարցումներ ու տրուեցան անոնց պատասխանները:

Աւարտին դեսպան Ջ. Աղաճանեան, յաջողութիւն մաղթեց բոլորին եւ շնորհակալութիւն յայտնեց իրենց հայանպաստ գործունէութեան համար. ան յորդորեց ջանք գործադրել հայ-հոլանտական կապերը աւելի սերտացնելու եւ երկու ժողովուրդներու բարեկամութիւնը ամրապնդելու: Դեսպանը նաեւ շնորհակալութիւն յայտնեց բոլորին՝ հայապահպանութեան ոլորտին մէջ ունեցած աւանդին համար:

ԱՅԼԱԶԱՆ

Ապուր

Գիտե՞ք, թե 100 կրամ բանջարեղենով ապուր մը միջին հաշուով 25 ջերմուժ կը պարունակե:

Ապուրը արագ եւ դիւրին միջոց է միաժամանակ քանի մը տեսակ բանջարեղէն ուտելու, իսկ բանջարեղէնները կենսանիւթերու եւ հանքայիններու անսպառ հանք են:

Ապուրը նաեւ յագեցնող է, առաւելութիւն մը, որպէսզի ճաշի ժամերուն միջեւ աւելորդ բաներ չուտէք:

Լուծուող բնաթելերով հարուստ բանջարեղէններով ապուրը դրական ազդեցութիւն կը գործէ քոլեսթերոլին վրայ:

Ապուրը նաեւ մարմնին կ'ապահովէ անհրաժեշտ ջուրի մէկ բաժինը:



Ապուրը կը նուազեցնէ սրտանօթային հիւանդութիւններու, ինչպէս նաեւ յամրադիի քաղցկեղի հաւանականութեան տոկոսը:

Ապուրը տաքցնող եւ հանգստացնող իտեպ ուտելիքն է ձմրան ցուրտ օրերուն:

Մասնագէտներու կարծիքով, տունը պատրաստուած բանջարեղենով եւ այլ ապուրներ շատ աւելի սննդարար են, քան պատրաստի ապուրները, որոնց թե՛ աղի, եւ թե՛ իւղի տոկոսը կրնայ շատ աւելի բարձր ըլլալ: Մինչդէռ տունը պատրաստուած ապուրները կարելի է տեսաբար այլազանել եւ մնայուն ձեւով օգտուիլ թարմ բանջարեղէններու բարիքներէն:

Սոխին 6 Բարիքները

Սոխը բնութեան մէկ հրաշքն է՝ օժտուած բազմաթիւ բուժիչ յատկութիւններով. ստորեւ կը ներկայացնենք 6 կարեւորագոյնները:



1 «Ճըռնըլ աֆ քլինիքըլ ինվեսթիկէշըն»-ի մէջ լոյս տեսած յօդուածի մը համաձայն, սոխը կ'արգիլէ արեան մէջ caillot-ներու գոյացումը եւ երակներու խցանուիլը: Արդարեւ սոխին պարունակած ռիպին կոչուած նիւթը, որ առկայ է նաեւ խնձորին մէջ ունի սրտանօթային հիւանդութիւններէ պաշտպանելու յատկութիւն:

2 Սոխը կ'օգնէ պայքարելու քաղցկեղին դէմ՝ արգիլելով ախտահարուած բջիջներու բազմացումը. կը հաստատեն «Քոռնէլ եունիվըրսիթի»-ի հետազօտողները:

3 Սոխը կը պարունակէ *քերսէթին* կոչուած նիւթը, որ կը նուազեցնէ արեան գերճնշումը: Նոյն այս նիւթը կը պաշտպանէ նաեւ արիւնատար երակներուն ներքին պատերը եւ բնականաբար կը պաշտպանէ սրտանօթային հիւանդութիւններէ:

4 Ուսումնասիրութիւններ ցոյց տուած են, որ այն կիները, որոնք յաճախ սոխ կ'ուտեն, դաշտանին նախորդող օրերուն նուազ ենթակայ են վորի ցաւերու եւ տրամադրութեան ելելէջներու:

5 Սոխը կը զօրացնէ ոսկորները: Հարաւային Քարոլայնայի Բժշկական համալսարանի մէկ ուսումնասիրութիւնը հաստատած է, որ օրական առնուազն մէկ անգամ սոխ ուտող կիներուն ոսկորները 5 առ հարիւրով աւելի զօրաւոր են, քան՝ հազուադէպօրէն ուտողներունը:

6 Սոխը կ'աւելցնէ *ֆոլիք* թթուի, կամ Պէ 9 կենսանիւթի քանակը՝ մարմնին մէջ, ինչ որ կը նպաստէ ուղեղին լաւ գործունէութեան, ինչպէս նաեւ՝ մեր մտային ու յուզական համակարգի առողջութեան:

 **ՀԱՄԱԶԳԱՅԻՆ**
Հայ Կրթական և Մշակութային Միություն
Քուէյթի Մեկուսի Կազմ

Գրական Երեկոյ

Աւետիք Իսահակեան

Մահուան 60-ամեակ



Հովանաւորութեամբ՝
Թեմիս Բարեջան Առաջնորդ Գերպ. Տ. Մասիս Մ. Վրդ. Զօպույեանի

Կազմակերպութեամբ՝
Գրական-Դաստիարակչական Յանձնախումբի

Մարտ 3, 2017-ին, երեկոյեան ժամը 8:00-ին, Սրբոց Վարդանանց եկեղեցոյ սրահէն ներս:

Սիրով կը հրաւիրենք գրասէր հասարակութիւնը